

Regional News Unit AIR Aizawl
Friday, February 28, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Transport Minister Pu Vanlalhlana'n nimin khan Mizoram sorkar hnuaia Department 17 te hnenah Lirthei thar 27 a hlan.
- Lai Autonomous District Council a Chief Executive Member atan nimin khan Pu V.Zirsanga lakluh a ni.
- Union Minister of State for Road Transport & Highways and Corporate Affairs Pu Harsh Malhotra chuan nimin khan Saitual District a tlawh.
- 13th National Para Judo Championship 2025 neih mekah a vawikhat nan Mizoramin Blind Category-ah gold medal a la.

<><><>

TRANSPORT MINISTER

Transport Minister Pu Vanlalhlana'n nimin khan Mizoram sorkar hnuaia Department 17 te hnenah Lirthei thar 27 a hlan.

Transport Minister Pu Vanlalhlana chuan Union Ministry of Road Transport and Highways (MoRTH)-in lirthei hlui tawh te hluihlawna, a thar a thlak tura lirthei neitute tana ruahmanna a siam Voluntary Vehicle Modernization Policy (V-VMP), Vehicle Scrapping Policy (VSP) SASCI Part-II) hnuaiah nimin chawhnu dar 1 khan Mizoram sorkar hnuaia Department 17 te hnenah Lirthei thar 27 te chu a sem chhuak a, Minister chuan vawiin programme hi Transport Department tana rahbi pawimawh tak a nih thu sawiin, nimina an motor semchhuah te chu SASCI sum hmanga lei a nih thu leh Transport department chuan he incentive hi mahni department bil atan hmang mai lovin, GAD nen tangkawpin tun ang hun duhawm hi an lo thleng ta tih a sawi a, India chu khawvela lirtheia chetsual tamna ber leh nunna chan an tamna ber a ni tih sawiin, Mizoramah ngei pawh kumin sawrkar kum kal lai mek February ni 19 thleng khan, lirtheia chetsualna tum 85 awm tawhin, mi 42 laiin nunna an chan tawh tih a sawi a, hei vang hian India sawrkar chuan lirthei hmangtute himna a ngaipawimawh em em a, Mizoram sorkar pawhin him taka lirthei hman a nih theih nan theihtawp a chhuah tih a sawi.

Lirthei hlanna programme hi Transport Secretary Pu Zosangliana'n a kaihruai a, Er. R.Lalrammawia'n technical report a pek zawhah Transport Minister Pu Vanlalhlana chuan Mizoram sorkar hnuaia Department 17 aiawha lo kalte hnenah lirthei Document pawimawh a hlan a, Minister chuan programme hman zawhah heng Lirthei 27 ten an Department theuh an pan tur chu a vailiam nghal a ni.

<><><>

CEM

Lai Autonomous District Council a Chief Executive Member atan nimin khan Paithar bialtu MDC, ZPM hruaitu Pu V.Zirsanga chu Lawngtlai DC, Pu Cheemala Siva Gopal Reddy chuan LADC Hall ah rinawmna thu tiamtirin a lalut, CEM atan Pu V.Zirsanga lakluhtur hi MNF Thalai leh Congress thalai chuan an duhlohzia an lantir.

CEM lakluhna hi LADC a Executive Secretary Pu K.Lalthanzara'n kaihruaiin, CEM atan lakluh a nih hnu ah Pu V.Zirsanga chuan a mimal taka Politician zingah beih tawk nasa ber a nih hial a rin thu sawiin, tuna a thahwpuite chu hun hmasalam ah pawh amah beitate an nih thu a sawi a, hetichung hian Pathian chuan inremlothe karah inremna siamtu atan amah chu a hmang ni a a ngaih thu sawiin, LADC Sorkar term tawite la awm chu Kalphungthar a kaihruaiin, ram in hma a sawntheih nan theihtawp an chhuahtur thu a sawi.

Pu V.Zirsanga chuan eiru a amah an puhna chu Court sang zawka thlen a nih thu leh tun dinhmun ah chuan eiruk leh rukloh chungchangah engmah thu tihchian a la awmlo a ti.

Pu V.Zirsanga CEM atan lakluh a nihhma hian MNF Thalai leh Congress Thalai ten LADC Gate ah, hminghliauna nei ram hruaitu atan an duhloh thu aupuiin, thuziak an kenga, CEM tur leh a laluttur Lawngtlai DC chu dan tumin pungkawm mahse, heng mipaiwmahw pahnih hian kawng dang atangin LADC Hall hi an pan a, harsatna thleng a awmlo.

MNF Thalai leh Congress Thalai te chuan nimin vek khan Lawngtlai Press Club ah Thuthar thehdarhtute kawmin, Chief Minister in LADC ah ZPM Sorkar a dintheih nan tumah an thlemloh thu a sawi chu mak an tih thu leh MNF leh INC a MDC te chu thlemloh a hlei an neilo tih sawiin, tuna CEM nita pawh intiamkamna eng eng maw nen Chief Minister hian a thlem tih an sawi.

<><><>

UNION MINISTER

Union Minister of State for Road Transport & Highways and Corporate Affairs Pu Harsh Malhotra chuan nimin khan Saitual District a tlawh a, Saitual District-a office hotute, Village Council leh NGO hruaitute nen inkawmhona hun hmangin, Saituala District Hospital, Govt. High School leh Tamdil te a tlawh nghal a ni. Union Minister of State hi District Bawrhsap Dr. Lalngura Tlau bakah District chhunga officer te leh NHIDCL lama hotuten an lo dawngsawng a ni.

Union Minister of State, Pu Harsh Malhotra chuan DC Conference hall Saitualah, Saitual District office hotute, VC leh NGO hruaitute nen inkawmhona hun hman a ni a, he hun hi District Bawrhsap Dr. Lalingura Tlau chuan a kaihruai a ni. He hunah hian Saitual District-a Deputy Commissioner Office, District Rural Development Office, Public Works Department, Public Health Engineering Department leh District Education Office lama hotute chuan an department chungchang te, an hmalakna te leh central scheme an kalpui dan te an sawifiah a. Village Council leh NGO hruaitute pawhin an mamawh te an thlen a ni.

He hunah hian Pu Harsh Malhotra chuan thu sawiin, Sawrkar laipui atanga Saitual District tlawh hmasa bertu a ni thei chu lawmawm a tih thu a sawi a, mipui tena tha taka an lo dawnsawnnaah lawmthu a sawi nghal bawk a ni. Union Minister of State chuan sawrkar laipui hmalakna (Central Scheme) hrang hrang a bikin, Mahatma Gandhi National Rural Employment Guarantee Act (MGNREGA), Pradhan Mantri Awas Yojana (PMAY), Jal Jeevan Mission (JJM) leh Mid-day Meal te chu Saitual District-a tha taka kalpui a ni chu lawmawm a tih thu a sawi a. Harsatna an tawh te ngaihthlakna hun tha a nei thei chu lawmawm a tih thu sawiin, Pu Harsh Malhotra chuan kalkhawmte chu an mamawh te ziaka thlen turin a chah a, a theih anga hma laksak a tum thu a sawi bawk.

<><><>

MPCC

Mizoram Pradesh Congress Committee chuan tunhnaia Sawrkarin sawhthing a lei ah sawhthing chingtute dem zawnga thusawi a awm chu pawl an tih thu sawiin Department lamin sawhthing an lak khawm kawnga an fimkhur lohna ah sawrkar chu hma la ngam turin an phut tih an sawi.

He thu hi nimina Aizawl Press Club-a thuthar thehdarhtute an kawmna ah sawiin Congress Farmers Department Chairman Pu Lalrinliana chuan sawhthing la khawmtu sawrkar fimkhur lohna ah mawhphurhna la ngam zawk se an duh a ti a, ZPM Sawrkar chu a intiam ang ngeia kuthnathawktute chin sawhthing chu lei sak vek se an duh tih sawiin an rate bituk cheng 50-a lei sak vek turin an phut tih a sawi.

MPCC chuan sawrkarin sawhthing a lei danah ngaih thatlohna tam tak a awm tih sawiin khaw hrang hranga lei tura an ruahman zingah a vaia lei loh a tam an ti a, kuthnathawktuten hah taka an thawhchhuah a nih avangin sawrkar chu a thutiam ding a, mipuite ti hnual lo turin an ngen a, Congress Party chuan eng Party pawh sawrkar se la kut hathawktu te dawmkanna Programme reng reng chu an thlawp tih an sawi bawk a ni.

Hei bakah hian MPCC chuan tunhnaiah social media-ah kum 1994-a Congress sawrkar laia an siam, The Mizoram Agricultural Produces (Restriction on Movement) order 1994 chu a nihna tak hre lovin dan sakei ang hialin miten an sawi darh tih sawiin he danin a tum ber chu kut hnathawktuten ram chhunga an thlai thar thenkhatte an hralhnaah state thenawm atanga kharchhawng 'middle-men' te an lo in rawlh thin avanga harsatna hrang hrang an tawh thinte laka an mahni humhalh a nihna anih thu an sawi a, he danin a humhalh te chu sawhthing, hmarcha, chhawhchi leh la (cotton) te an ni a, he dan hian heng thlai thlan bik 5 te hi phalna bik nei lo te tan state pawna phurh chhuah a remti lo tih an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



JUDO

13th National Para Judo Championship 2025 neih mekah a vawikhat nan Mizoramin Blind Category-ah gold medal a la.

13th National Para Judo Championship 2025 hi Uttar Pradesh khawpui pakhat, Lucknow-ah tun thla February ni 24 atanga vawiin thleng hian neih a ni dawn a, a Mizoram aiawha Blind Category kg-81 huanga tel David Lalremruata, West Serzawl khua chuan a khingpui te chu Ippon (knock out a) hneh vekin a vawikhat nan Mizoram tan Gold a la a ni. Mizoram tana Gold latu, David Lalremruata hi Team Manager Jerry Lalramenga, Durtlang leh Coach Miss Madhu Chettri ten an kaihruai a ni.



MIZORAM ANTHURIUM

APEDA-Agriculture Product Export Development Authority of India leh Horticulture Department Mizoram leh Zo Anthurium Growers Co-operative Society te tang kawp chuan a vawi khatna atan Mizoram Anthurium te chu Singapore a thawn turin ni 26 khan Agriculture Secretary, Pi Ramdinlianin a vai liam. He hun hi Directorate of Horticulture, Aizawl a neih a ni.

Ram pawn a hralhchhuah hian Anthurium chingtute tan a hlawk zawk theih beiseina a san avanga Singapore a thawhchhuah na hi ruahman a ni a. First Trial shipment atana Anthurium Singapore a an thawhchhuah zawng zawng hi par 1008 niin kg. 70 a rit a ni.

Mizoram Anthurium te hi kum 2004 vel lai atang tawh a chin tan a ni a. Zo Anthurium Growers Cooperative Society te hian Member 150 vel bawr Aizawl chhung leh district hrang hrang ah te neiin kum 20 vel bawr state pawnah-Delhi Phool Mandi- Ghazipur ah Anthurium te hi an hralhchhuak reng a ni.

